

Tukaran lawatan eratkan hubungan Malaysia — RI

KUCHING, Isnin — Pertukaran lawatan dari peringkat negarawan sehingga kepada kumpulan sosial dan budaya Malaysia dan Indonesia telah mengeratkan perhubungan antara kedua buah negara.

Demikian dinyatakan oleh Konsul Indonesia untuk Sabah dan Sarawak, Encik Budi Ismadi di satu majlis ringkas sempena ulang tahun Kemerdekaan Indonesia ke-36 di Wisma Indonesia di sini hari ini.

Dalam ucapan yang dibacakan oleh Konsul Muda Pertama, Encik Jaumil Nikmatullah, beliau berkata kunjungan-kunjungan seumpama itu telah menghasilkan "saling pengertian dan kerjasama yang lebih nyata dalam berbagai bidang."

Katanya, pertemuan tidak rasmi Presiden Suharto dengan Datuk Seri Dr. Mahathir Mohamad di Tawau Februari lalu telah menghasilkan keman-tapan dan keseragaman dalam menghadapi masalah luar negeri dan berbagai bidang kerjasama Asean termasuk bantuan tenaga kerja Indonesia dalam pembangunan Malaysia terutama di Sabah dan Sarawak.

Kerjasama

Di samping itu kerjasama di sempadan bersama melalui penyelarasan jawatankuasa-jawatankuasa perbalasan telah memberi munafaat besar kepada kedua negara.

Encik Budi menggesa kakitangan Konsul dan rakyat Indonesia di Sabah dan Sarawak sentiasa mengembang dan meningkatkan tali persaudaraan dan muhibah dengan rakyat Malaysia di kedua negeri tersebut.

Beliau juga mengingatkan mereka supaya menjaga disiplin dan memelihara persatuan sesama warganegara Indonesia.

Mereka juga diingatkan bersedia menghadapi pemilihan umum tahun depan di mana kira-kira 38,000 rakyat Indonesia di Sabah dan Sarawak dijangka mengundi.

Upacara ringkas itu dimulakan dengan menaikkan bendera dan diikuti dengan bertafakur mengenang pahlawan-pahlawan yang gugur, proklamasi kemerdekaan dan diakhiri dengan doa selamat.

Peringatan ulang-tahun kemerdekaan Republik tersebut dimulakan lewat tengah malam tadi dengan satu upacara mengenang kembali perjuangan menuntut kemerdekaan yang dikenali sebagai 'renungan suci' yang diadakan di bawah sinaran obor-obor.

Bernamea.